

# Praschun per persunas ch'appelleschan ad acts terroristics

Moziun da Heinz Brand

■ (anr/vi) Tgi che stiga si auters tar activitads terroristicas duai vegnir en praschun. Quai giavischa Heinz Brand (pps/GR) cun ina moziun ch'el ha inoltrà durant questa sessiun. Ina tala disposiziun manchia anc uss en la lescha, di il cusseglier naziunal sin dumonda da l'anr. Il mars è in um da l'Irak vegni condemnà – ensemen cun trais auters accusads – a passa trais onns praschun perquai ch'el aveva sustegnì l'organiziun da terror SI. Questa stad ha la dregira penala federala gia puspè relaschà el. Tals cas less *Heinz Brand* impedir cun sia moziun. El pretenda disposiziuns pli severas: Uschia duain persunas che appelleschan ad activitads terroristicas vegnir en arrest u vegnir impedidas sin outra moda ch'ellas sappian stigar si. Quai vala era per persunas che dattan entruidament per acts terroristics u che annunzian, finanzieschan u favuriseschan tals.

Esters che fan talas chaussas duain vegnir exiliads en il pajais d'origin. Fin tar l'expulsiun duain questas persunas restar en arrest.

## Nagin scumond d'expulsiun

«Adina dapli persunas sajan sin il radar dal servetsch d'infurmaziun», scriva Brand en sia moziun. «Ellas sa fatschentan cun differentas lavurs da preparaziun u en il mender cas perfin cun realisar activitads terroristicas.» Era sch'ils attentats na vegnian betg fatgs en noss pajais na dastgia la Svizra betg daventar in lieu nua



Cusseglier naziunal Heinz Brand (pps/GR).

FOTO O. ITEM

che terrorists possian sa retrair per planisar lur acts da violenza.

Quai possian ins impedir sch'ins arrestia immediat talas persunas e sch'ins bandegia tals esters en il pajais d'origin. Il medem valia era per esters che sa chat-

tan en ina procedura d'asil. Brand regorda il cussegl federal en quest connex ad ina disposiziun en la lescha d'asil. Tenor lezza na pon persunas, che pericleteschan la Svizra u ch'èn ordvart privlusas, betg sa referir sin il scumond d'expulsiun.